



Il Poeta

SALVATORE SUCAMELE

nato a Trapani il 29/5/1926

residente a TRAPANI

C/da Porticalazzo

SUNNU VIDDANI ITTATI A LA CAMPIA

. . . chi notti e jornu, pi lu so distinu,
'ntra cauru e timpesti li viriti
chi vannu a travagghiari di cuntinu
pi nutricari a tanti parassiti,
e pi la ricumpenza di stu beni,
chi lu viddanu genira e produci
'ntra stenti, 'ntra sururi e amari peni,
n'accanza di purtari dda gran cruci :

di essiri pirfinu disprizzatu
di scerti cittadini e nubiltà
chi ntra la vita un sannu mai sunnato
l'affanni, li fatii e l'avversità,
ma c'hannu fattu sempri u nesci e trasi
ntra scirculi, caffè, cinema e tiatri
dunni sti farabutti e gran mmastasi
si mancianu li rènniti di patri.

. . . e all'occasioni di sta milunata
vi parlu d'un gran celebri pueta,
chiddu chi porta a birritta ciuriata
e gira u munnu ngruppa na cumeta,
chiddu chi appi dda frasi premiata
e a Viareggiu u nciuriaru Pueta.
Ed'ora amici vi sugnu sinceru,
vi ricu u nnomu e ci parlu pi bberu !

Caru Buttitta, mparatillu a mmenti
e un t'u scurdari cchiù pi mentri campi:
Paceca di puisia è nna surgenti
chi di sunetti e ottavi avi li stampi;
si ssi pueta e dottu veramenti,
chi passi mari e acchiani e scinni rampi,
passati allura a manu pi lu pettu,
rispunnimi nna vota c'un sunettu,

e lu dimostri a tutti apertamenti
chi si all'altezza e chi lu sai fari,
e ghiò ti giuru n'arrestu cuntenti
ti pozzu puru scusi addumannari.
Ma si cci cunti lu fattu a li genti
di la matri tetesca, fà pinzari
ch'è veramenti misiru stu fattu
e ssa quantu pirnacchi t'annu fattu.

Poi c'è un dittu: quannu l'omu nasci
veni assignatu pi lu sò distinu,
poi c'è la sorti, lu cunnuci e pasci
e l'accumpagna pi lu sò caminu,
c'è a ccu ci runa beni e gloria a casci
e a cu è chi lu sdirrupa a lu pinninu.
E la tò sorti è tanta esaggerata
chi nati sulu a tempu di chinata.

E mmeci lu viddanu, u milunaru
nascennu pi natura sfurtunatu
lu viri sempri o' picu a lu filaru,
troffa pi troffa ci va' dannu sciatu.
E si li vermi i troffi ci manciaru,
li risimina, stancu e scunzulatu,
però un s'arrenni, anzi, cchiù mpignusu
ripigghia stu travagghiu pacinziusu.

E allura, datu e quantu all'occasioni
chi vai in Olanda, Mbelgiu, Mbulgaria,
di n'Inghilterra passi a lu Giappuni,
d'in Russia, in Danimarca, in Rumania
e tanti e tanti autri nazzioni,
pigghia un miluni di Paceca mia
e datu chi cu tutti sai parlari,
rumpilu unni voi tu, fallu sazzari.

E quannu u rapi nesci l'armunia
di sciauru, lirizza e di sapuri;
nesci lu sucu di la puisia:
missaggiu di buntà, di paci e amuri,
e nesci puru tutta 'da valia
di cu cci travagghiau c'un suduri
ch'è sulamenti orgogliu di viddanu,
sulu accusi ti battinu li manu.

Lu voi un cunsigghiu bonu? Ascuta a mia
veni a Paceca, a mettiri miluna
e ti lu giuru, nun'è fantasia
e mancu è pi cuntariti balluna:
metti purceddi e nasci puisia
e ti fai 'rossu ntra li puituna,
e ghiò, cu Sarafinu e u zu Rusanu
vinemu o ncontru e ti strincemu a manu.

Poi, si nun stai a stu tonu di campana
e ti vavii di tantu di cultura,
t'ammitu a pulisiari nna simana,
però cu pisu, passu e cu misura,
e la genti di luntanu e paisana
putrà apprizzari tutta sta bravura,
e si m'abbatti, ncuminciannu d'ora,
ci ricu a me muggheri: lassami fora!

•

**Poi si nni prea quannu sunnu liati
chi sù na maravigghia a luntananza.
'Nda lu pagghiaru i sonna ammunziddati,
lu cori si cci Inghi di spiranza.
Poi si li sonna arrè tutti spaccati
e perdi arrè la vogghia e la spiranza.
Però 'ntra li fastiddii e li santiuna,
all'annu appressu metti arrè miluna.**

A R T E

Si lu pueta è un geniu, un purtentu
Nun s'abbassa nè pi sordi nè pi canti,
Ama cu veru cori e sintimentu,
E nun si scanta mancu di li santi.
Si scanta quannu senti un lamentu
Di l'arti scapisata di gnuranti.
E ghiò parlannu all'acqua, o sulì o ventu
Ci ricu: levamilli di ravanti.

Picchì si l'arti affidata veni,
Mmanu a disonesti e burattini,
E allura è chiaru chi ntra mali e beni
Li megghiu ciuri diventanu spini.
Iò parlu d'accussì si vi cummeni,
Pi mia nunn'asistinu catini.

COMMENTO ALLE POESIE " MAMMA "

Nuddu pueta è capaci a ddiri
l'amuri di la matri quantu vali !
E quantu voti - Matri - si pò ddiri
tantu ntra lu beni chi ntra lu mali.
Stu nnomu ci fu datu pi putiri
agghiuttisi li pesti universali,
e cu è c'unnavi matri o nun ci criri
bastassi sulu vardari l'armali.

Cu quali amurusanza e lu piaciri
fannu li figghi e stentanu cu amuri;
nuddu disastru mai la fa piriri,
duna li carni soi senza duluri,
è comu nna surgiva a mmai finiri
e ntra l'affetti è l'unicu valuri.

SICILIA D'AERI E DI ORA

Sicilia mia, terra profumata,
specchiu di li biddizzi chiù 'mpurtanti,
di tuttu l'universu s' la fata
pi li tò preggi e mistiriusi 'nganti.
Matri di puisia, dusci, ammilata,
ciumi d'amuri e mmartiri Emigranti.
Di tanti Razzi fusti 'nsangunata,
di sfruttaturi, Principi e Rignanti.

Sicilia mia, di marcata e lupara,
di storia e d'omertà fora misura.
Di juvu, di carretti, di pagghiara,
di marmi, di salini, di sudura,
di zacara, di suli, di tunnara,
di sciarri, 'ntressu e patriscinatura.
Di tia ni fannu sta biddizza rrara
spittaculu maistusu di natura.

Poi li Viddani pi lu sò distinu
'ntra cauru e timpesti li viriti
chi fannu a travagghiari di cuntinu,
spissu affamati e morti di la siti.
Cu tuttu stu furmentu, ogghiu e vinu,
scausi, nuri e apperi li viriti.
E n'atra cosa: tortu annu lu schinu,
purtannu 'ncoddu sti gran parassiti.

Ora però li tempi sù cangiati.
La libbertà, la scola, la struttura
ficiru binfatti, ponti, strati,
si meti e si simina cu trattura.
Ma viù cosi 'mpurtanti trascurati.
E' pi difettu?, o è pi cunghintura?
V'arraccumannu allura, raggiunati!,
n'un stati cu la testa a manciatura.

L' OLANDESINA

Quann'ivi a travagghiari
pu terremotu a Gibellina
mi successi d'incuntrari
nna sciacquata olandesina.

Si firmau mmezzu la strata
un passaggiu vosi datu
e mi detti nna taliata
chi mi tirau lu ciatu.

Poi mi misi a dumannari
. . . certi cosi all'italiana
ma jò stava a taliari
quasi sempri la sottana.

Idda allura lu capiu
e natr'annicchia l'acchianau
pigghiannumi un firriu
chi firriusu mi lassau.

Poi l'unnumani vinni arrè
pi gghiri a fotografari
e mi nni fici quant'è gghiè
chi un romanzu c'è di fari.

Doppu quasi nna simana
mi vinni arrè ad abbrazzari
e mi detti dda sottana
pi ricordu a mmia ristari.

Me muggheri quannu 'ntisi
sta sottana quantu ja
giuramenti tinti fici
chi talialla cchiù un'vulia.

Jò ci dissi: senti ammia
l'intirizzo l'aiu ccà
s'un ti passa sta mania
ci l'abbuccu arrè pi ddà.

A NA PUTIARA

Signura; si capiri Tu putissi,
quantu stà pinannu stu mè cori,
sugnu sicuru chi Tu mi ricissi:
sangu meu nun vogghiu chi Tu mori.

Vasa sti labbra mei frebbriticanti,
strincimi un momentu cu puisia
ma un ci passari chiù di cca ravanti
e scordati pi sempri sta putia.

Signura, si facissi stu parlari
doppu chi ti strincissi a lu me cori
pi r'essiri sicura di jò un parlari
jò ti ricissi: spaccami lu cori !

Cuntenti jò di moriri sarria
'nda li to manu comu na carizza.
Dimmi na vota sì, Putiara mia,
prima chi mmoru, dammi sta lirizza.

E C O N O M I A

Un ghiornu u Cuccu e u cani di campagna
Nguntrannu a lu maestru Pandalacca
Ci rissinu: maestru, sunz'appagna
E lu riscussu nostru nun l'untacca,
Vurrissimu parlari cu vossia
P'unnesperimentu sull'economia.

E tutti tri d'accordu s'affittaru
Un malasenu a ciaramiri anniati,
E doppu un misi quasi strummintiaru
Di sparagnari puru li cacati.
Scusati si vi parlu a sti maneri
Ma lu riscussu, ava viri peri.

Difatti u Cuccu maritannu un figghiu
Ci fisci un quartu senza cabbinettu
Ci rissi: senti ammia caru figghiu
Chista è na liggi di novu pruggettu
Pi diri veramenti sparagnari
Puru di chissu samu a limitari.

U cani di campagna l'atra sira,
Mentri u maestru la lezioni dava,
Pi sparagnari fin'anche la lira
Cu li causi calati s'assittava.
Siccomu la lezioni era data
Pi sparagnari a cannila astutata.

Comu la lezioni poi finiu
E lu maestru dissi d'addumari
Lu cani di campagna si susiu
E li causi si cuminciau a ngugghiari.
E ci rissi a lu maestru: si permetti
Lu fisci pi sparagnu di funnetti.

Bravu, ruspunniu lu prufissuri,
Lu bon maestru fin'a vecchiu mpara.
E allura, datu chi nun c'è chiù erruri,
Pi na scoperta tantu accusi rrara
Tutti tri d'accordu cunsigghiamu
Di diri a lu governu: sparagnamu.

NASCENNU SFURTUNATI

Quannu chi un'omu nasci sfurtunatu
pi mentri campa nun pò mai truvàri
un mezzu pi livarisi di statu,
cchiù chi s'affanna, cchiù stenta a campari
cchiù cosi storti ncontra e va di latu.
Sulu la morti aggivulallu pari
però, picchè ? Pi pàtiri cchiossai:
difatti nun lu viri quasi mai !

Quanti malati, vecchi, menomati
chiancinu li peni a mmai finiri
virennusi pi ghiunta abbannunati
e la murtazza pari sinni riri,
e poi picciotti sperti, ben furmati
chi sunnu un paradisu di piaciri
lassanu li figghi e la muggheri
la morti l'annu sempri peri peri.

E allura si lu munnu fu criatu
lu mastro unn'era ancora arrinisciutu,
dunni mi votu e sbotu in ogni latu
trovu cosi torti ogni minutu.
Scusati si vi paru esaggeratu
ma jò raggiunu ntra lu cuntinutu.
Nna cosa sula m'à piaciutu assai,
ma dura picca, e mancu l'apprizzai.

TRUCCU E PITTURA

Milena mia, ti vitti l'atra sira
senza nudda larma di stanchizza.
Dicisti: si la fimmina un s'ammira
all'omu nun pò dari la lirizza
di rallegrallu e 'ntinniririci u cori.
Pinzai tutt'annotti sti palori.

Li carni mi li 'ntisi comu friiri
chi ntesta mi mittisti stu pinzeri.
Però Milena mia, si mi criri,
datu c'un si trucca me mugheri,
prima chi ci ricu t'appittari,
sta prova, niatri, la putemu fari ?

Certu me mugheri fussi leta
si cciaccattassi tutti sti culura.
Perciò, Milena mia, statti queta,
fammi pruvati annicchia sta pittura.
Si ntra sta prova tu mi cunvincissi,
stu fauri a me mugheri ci facissi.

A CATERINA M. DI 8 ANNI

Catarinedda mia pulita e bedda,
Tu sì na picciridda 'nzucarata,
speria e vivaci comu pispisedda
comu a to Matri 'ntuttu si 'ntrissata.
Mancu a nov'anni si na massaredda
ti viu quasi sempri 'ntrafichiata,
ti lavi puru la to vistedda
comu si fussi granni gi'arrivata.

Puru ogni tantu fai la sartinedda
comu si cci nascisti già 'mparata.
Hai lu fari di na vicchiaredda
e biata la to Matri furtunata
chi ti criau tantu sapuritedda
china di tantu sennu 'ncurunata.

U PICURARU DI VALDERICE

Caru Peppi 'A Sala, chi t'addiri,
U'ns'arraggiuna chiù, u'nsi pò campari.
S'ammazza a Moru, e poi si fa spariri;
miliardi c'un paisi poi accattari,
e un c'è na testa chi si fira a diri :
l'amu a finiri abberu di babbiani.

E tu cretinu, miseru e 'nguscienti,
appena tinn'adduni sì arrubbatu
spari ammuzzu e nun cunchiuri nenti,
anzi n'accanzi d'esseri arristatu.
Ma va fa 'nculu, ammazza un pridenti
e viri c'ungivai cacciaratu.

Nota :

Questa poesia è stata ispirata da un fatto di cronaca apparso sul Giornale di Sicilia.

LU MATRIMONIU DI ME FIGGIU MARIU

Parenti, amici tutti, c'attintati.
Vi dicu, un grazziàtutti; cu lu cori.
E ssi'nsilenziu, p'un momentu stati;
Vi dicu ancora, n'atri dù palori.

Sugnu cuntenti, n'un lu pozzu njari.
Però n'un potti aviri lu piaciri,
D'aviri a tutti, e chiù cuntenti fari.
D'attoniti, tutti cosi un sì pò aviri.

E d'ora parlu cu sti beddi zziti,
Chi viramenti ciù putemu diri,
E finalmente sulì ora nisciti.
Gudennuvi la vita e li piaciri.

Mariu, lu matrimoniù unn'è lu cuntù;
Che s'è sbagliatu si ritorna a ffari.
Eccu! è propriu cca chi stà lu puntu,
Quannu lu sì si sta pi cunfirmari.

Stu si 'ncapu l'altaru rapprisenta,
Davanti a Diu e l'omini d'onuri;
La cosa basiliari, chiù stupenda,
Chi metti a prova tuttu lu valuri,

D'un'omu cav'addari garinzia
D'amuri, di rispettu e protezzioni;
A la famigghia pi la giusta via
Senza cangiari chiù la sò 'ntenzioni.

E supratuttu, n'atra cosa ancora:
D'aviri figghi bbeddi e apprisinzati.
Mparalli comu tannu, no comu ora:
Licchi, fracchi, tosti e scustumati.

Me Nora lu capisci, già mi senti.
Di Matri assumi un compitu 'mpurtanti,
D'aviri cura diliggentimenti,
Pi tuttu soccu capita davanti.

Picchè sbagliannu stu contrattu Santu,
Chi forma tuttu lu nostru avviniri;
L'amuri nostru si trasforma 'nchiantu
Ntra colluri e turmenti di 'fuddiri.

Ma sti filici sposi si amerannu,
Cu granni amuri e cu pussenti affettu,
Chi tutti quanti un ghiornu ammirerannu
Chi nuddu di dui cadì 'ndifettu.

Ora chi ssiti Sposi Veramenti,
Biniritti di mia e lu Signuri,
Vajtiminni libbiri e cuntenti
E un vî scurdati a ffari a Sarvaturi.

A LA SIGNURA ACRESTI CRISPINA

La puisia, gentili mia Signura
nun'è comu la penzanu na pocu,
nun'èsti tali e quali la pittura
chi 'ncuminciati quasi comu un gnoco
e poi v'assuggittati addirittura
chi si nun vi pittati un c'è chiù scopu.
La Fimmina ch'è bedda di natura
è la ginialità pi n'ogni llocu,
m'àsciota senza regula e misura
apporta scustumanzi, pesti e focu.

Diventa spissu poi caricatura
ma, ntra lu mi cummeni, trova sfocu.
Stu litru, sta balanza, sta misura,
all'ura chi li ficiru pi ghiocu ?
annunca, chi ni servi sta cultura
quannu chi lu sinzazzu arriva docu ?
Ma no pi chissu cara mia Signura,
vinissi cca, facemu un suprallocu.

LEVANZO

Levanzo, è un'Isula abbitata
di genti picca e tutta rispittusa.
D'un mari pulitissimu atturniata,
d'un'aria quasi ch'è miraculosa.
Pi quagghi e pi cunigghia ammintuvata
pi fungi e pi tumazza purtintusa.
'Nda la stasciuni è sulu pupolata
di gran biddizzi jttati a la rinfusa.

E sutta u lustru di la luna chiara
da limpita risacca chi si movi
pari chi ti riscì e chi t'impara
a ffari ancora matascini novi.
Levanzu mia, di tutti, bedda e cara,
ti vogghiu d'accussì!, comu ti trovi!

(LA SIGNURA MANTUVANA)

Un ghiornu, na signura Mantuvana,
picciotta bedda, longa, agghimintata
di origgini di razza Siciliana,
e disiusizza di la panza unciata,
metti a pinzari: e caminannu apperi,
s'incontra cu Vanessu u giàrdineri.

Un'omu curtuliddu a mezz'età,
billicchittusu, spertu, chiacchiaruni.
Ci dici: Signura . . . e comu cca ?
Jò sugnu lu sò servu addinucchiuni.
Mi cumannassi; Lei è la mè patruna,
pi mia li sò palori sù vasuna !

Difatti, jò nun sugnu cca pi ciuri.
Ma vinni pi tanticchia di simenza,
chi siminata cu giurizziu e amuri,
s'avissi a trasfurmari 'mparturenza.
Stu fattu, lu sapemu . . . tutti rui,
Vinni sta vota e n'un ci vegnu chiù.

Vanessu, tuttu letu cummattiu.
Però la varca 'mportu la purtau,
picchè a li novi misi chi sinniu
un beddu ritratteddu cì'arrivau.
E doppu quinnici'anni maritata,
Fiorella a picciridda fù chiamata.

A NNA PICCIOTTA DI PANTIDDIRIA

Signurinedda mia chi s'ì nnamuri
e di Pantiddiria nni manni a diri
c'avia raggiuni lu pueta Turi,
ma nni lu stessu tempu, havi a capiri
chi tuttu un fasciu certu un si pò fari :
ci nn'esti puru assai chi sannu amari.

Certu, - Jò ti rispunnu - è un fattu veru,
ma p'un Poèta tintu e scapizzatu,
Tu chi pinsassi chi sarria un misteru,
assecunnu di quantu nn'a 'ncuntrato ?
L'onesti ci su puru e 'nquantità,
ma jò rispunnu sempri e dicu: mah . . .

Poi . . . a riguardu di lu cumannari,
lu rissi puru 'u Presidi Ruggeri,
nun sunnu li sgarbanzi e abbusi fari
e allura . . . ci 'mmiscava a mè muggheri,
ch'esti 'na mogghi d'oru e 'nzuccarata
na cosa troppu bona e sparaggiata.

Anzi, ti pozzu diri apertamenti,
chi mi pò dari scola e 'mparamentu,
nun havi nè pittura, ne patenti,
nun ama spiaggia, nè divertimentu,
nun fuma nè 'mpalisi, nè ammucciuni
ed è patruna di lu mè cascuni.

Lava, arripezza, stira e fa lu pani.
Vinni appressu a mia puru a 'nnistari,
chi fù la maravigghia d' 'ì viddani
e San Leonardu e Birgi 'u pò affirmari
però, ogni tantu, puru nni sciarriamu,
mi rici ogni momentu: - sparagnamu . . .

Difatti, l'atra vota custatannu,
quannu . . . chi c'era ddà . . . 'ddu pappagunnu,
quantu sordi - mi rissi - stai spardannu . . .
ma lassali arragghiari d'unni sunnu . . .
l'abbrazzi, li difenni e duni prova
e pi darrè ti chiantanu li chiova.

Poèti e dotti nni canusciu assai
ma Omini, . . . ma fiscì . . . nenti chiui.
Eccu, Nicuzza, picchè 'un riru mai,
e la pacenzia comu ancidda spui.
Perciò ricorda: - cchiù rispettu porti,
li chiova ti li 'ncarcanu cchiù forti.

Allura, Nica mia, chi t'haju a diri:
- curru e m'apponu a lu pettu di mè mogghi
e sentu la rucizza e lu piaciri
scurdannu li disaggi, peni e 'mbrogghi.
Però, si ci pinsava chi 'u sintia,
tutti 'sti cosi, nun ti li ricia.

LU SEQUESTRU DI LU MORTU

Viri la dilyngenza dunn'è ch'è ghiunta
s'arrobba un mortu e si cci manna a diri
un miliardu e ancora pi gghiunta
s'un v'allistiti lu facemu spariri;
un mumentu rispunni la parti,
quannu s'è vivi s'arriva e si parti,

ma ddopu chi fu misu 'nseportura
a ccu vuliti fari 'ntimoriri ?
Lu chiancemu fora ogni misura,
e ora si chianci, si vivi e si riri
poi chi di "di" fu passatu a "fu",
tinitivillu, c'un ci servi 'cchiù !

Nota :

Il fatto è stato ispirato da una cronaca torinese avvenuta nell'anno 1976.

BOTTA E . . . RISPOSTA

A ME FIGGIU DANIELE

Botta :

Quannu ti siminai, strata facennu,
vitti chi lu tempu un pirmittia.
Allura dissi: ma chi staiu facennu ?
Ma la simenza cogghiri un putia.
P'unn'allungari ancora, cunchiurennu,
nascennu tu, fu la ruvina mia.

Risposta :

Caru Patri, quannu fici a mmia,
ssa quantu cosi a mamma ci cuntava,
ssa quantu minzogni ci dicia
pi quantu accussi l'accuntintava.
Difatti, comu ranni addivintai,
capì chi virità unni ricu mai.

PITITTU E SPIRIENZA

Di picciriddu vinni nutricatu
a la campia, 'mmezzu a li scarsizzi.
Facia lu riunu e scausu e vagniatu
durmia cu li carni rizzi rizzi.
Ma l'arvuli, l'armali, lu spaventu
mi rettiru lu megghiu 'mparamentu.

'Nda nuddu libbru haiu truvatu ancora,
lu chiddu chi mi retti la natura.
E spesciarmenti poi durmennu fora
sutta li lampi e trona addirittura
liggià 'ncelu chi paria aggiornari:
sulu matri natura pò 'mparari.

Cu l'esperienza, chi ti nutri e pasci,
na moda scunghiuruta ti trarisci.
Ma cu l'amuri e lu bisognu nasci
lu 'ngegnu la 'nvinzioni e parturisci
l'arti, ch'è lu ciatu d'un Pueta,
E sulu 'nfantasia la vita è leta.

COMU TI CHIAMI ?

Ricordati, mi chiamu Sucameli !,
e l'api un sunnu, sai, boni vicini:
pi stari 'mpaci ciappurtari meli
e ciuri frischi di profumu chini.
Sulu accussì li pigghi e ti l'arreni,
ma pensatilla bona, si cummeni.

E Ddiu un vurrissi chi ti veni mmenti
chi quarchi sgarbu cci vurrissi fari !
Ti giuru, senti ammia, chi ti nni penti:
cu la liggi di l'api un ci babbiari !
Hannu nna liggi sacra e naturali:
fannu giustizia senza tribunali !

Su labburiusi, utili e massari,
cogghinu lu meli di li ciuri,
nun c'è ducizza chi ci pò appattari.
Si stannu sempri arrassu a li futuri
circannu li ciuriddi naturali . . .
Si nun li noci, nun ti fannu mali !